

Hilda de Windt Ayoubi

LENGA 2 Un oda na Lenga

Lenga,
Sin bo mi no tin rumbo
Sin bo mi no tin mundu
Sin bo mi no tin nada

Ma stima bo
No pa plaka ni poder
Sino pa bo mes

Ma adorá bo
Te pèrdè mi mes
Den un nubia hel hel

Pero mi no sabi
Kon mi tin ku deklará esaki
Asta ni ku e palabranan
Ku bo mes un dia
A yega di siña mi

Ma hala rosea
Ma konta strea
Sin salida
Sin bida

Tur hende tin nan motibu
Tur hende tin nan destino
Tur hende tin nan manera
Di haña rosea

Lenga,
Pa ami ta abo
Tabata e manera

Bisa mi
Kiko mi mester hasi
Pa sin bo mi bida haña rumbo
Pa atrobe mi tin un mundu

Ma tehe pa bo
Un tela di lenga

Bisa mi ki palabra
Ta hasi bo falta
Mi no ta rabia
Mi ta komprondé

Bisa mi ki palabra
Bo ta haña superfluo
Mi no ta sara
Mi ta komprondé

Ta asina ta bida
Palabra ta bini
Palabra ta bai
Pero abo lenga
Semper ta keda

Lenga,
Ba yuda mi
Deskubrí e misterio
Ku tei na mama tera,
Asta te leu den hemisferio

Tantu lus
Ba laga sendé,
Te den fondo di mi kurason
Mi no sa si mihó mi wanta e doló
Mi no sa si mihó mi pag'é

Tantu kos ba laga pendiente
Tantu kos ainda mi ta kere

Ohalá
Tur kos bai bo bon

Ohalá
Ora mi no tei mas
Bo no lubidá e palabranan
Ku un dia pa bo ma murmurá

Ohalá bo haña un otro
Ku kier kanta nan

Pa bo benanan
Yena ku sanger
Un biaha mas!

I Lenga,
Kòrda ku sin hende
Bo no tin nada mas pa krese

Bo tambe no tin rumbo
Bo tambe no tin mundu...

Kòrsou, 25 di ougùstùs, 2019